

Na osnovu člana 13. Zakona o principima lokalne samouprave u Federaciji BiH („Službene novine Federacije BiH“, broj 49/06 i 51/09) i člana 84. Statuta Općine Stari Grad Sarajevo („Službene novine Kantona Sarajevo“, broj: 20/24), Općinsko vijeće Stari Grad Sarajevo, na 40. redovnoj sjednici, održanoj dana 31.10.2024.godine donijelo je

**NACRT**

**PRAVILNIK**  
**O FINANSIRANJU/SUFINANSIRANJU SPORTISTA SA PODRUČJA**  
**OPĆINE STARI GRAD SARAJEVO**

**I – OPĆE ODREDBE**

**Član 1.**  
**(Predmet Pravilnika)**


Ovim Pravilnikom uređuju se opći uslovi, postupak i kriteriji za finansiranje/sufinansiranje vrhunskih/perspektivnih sportista sa područja Općine Stari Grad Sarajevo, kao vid podrške sportu na području Općine Stari Grad Sarajevo.

**Član 2.**  
**(Korisnik prava sportista)**

Korisnik prava **sportista** za dodjelu sredstava prema odredbama ovog Pravilnika je lice koje ima status vrhunskog ili perspektivnog sportiste sa mjestom stanovanja na području Općine Stari Grad Sarajevo.

Sportista u smislu ovog Pravilnika, su osobe uključene u sljedeće:

- a) sportske aktivnosti i igre organizirane radi postizanja sportskih dostignuća koja se ostvaruju prema utvrđenim pravilima (sportska takmičenja i sportske priredbe);
- b) sportske aktivnosti i igre koje se organiziraju s ciljem unapređenja zdravlja ili rekreacije (sportska rekreacija, sport za sve);
- c) sportske aktivnosti organizirane za lica s invaliditetom;
- d) organizirani školski i univerzitetski sport.



## **II – VRHUNSKI SPORTISTI**

### **Član 3. (Status vrhunskog sportiste)**

Vrhunskim sportistom prema odredbama ovog Pravilnika smatra se sportista koji ispunjava jedan od sljedećih kriterija:

- ostvarena olimpijska norma;
- učešće na Olimpijskim igrama;
- učešće u završnici Svjetskog prvenstva;
- medalja Evropskog prvenstva;
- medalja Mediteranskih igara;
- medalja Balkanskog prvenstva.

## **III – PERSPEKTIVNI SPORTISTI**

### **Član 4. (Status perspektivnog sportiste)**

Perspektivnim sportistom prema odredbama ovog Pravilnika smatra se sportista koji ispunjava jedan od sljedećih kriterija:

- učešće u završnici Svjetskog prvenstva u seniorskoj ili konkurenciji kojoj sportista pripada po godinama;
- učešće u završnici Evropskog prvenstva u seniorskoj ili konkurenciji kojoj sportista pripada po godinama;
- učešće u završnici Mediteranskih igara u seniorskoj ili konkurenciji kojoj sportista pripada po godinama;
- učešće u završnici Balkanskog prvenstva u seniorskoj ili konkurenciji kojoj sportista pripada po godinama;
- medalja na državnom prvenstvu u seniorskoj ili konkurenciji kojoj sportista pripada po godinama;
- članstvo u reprezentaciji.

## **IV – JAVNI POZIV ZA DODJELU FINANSIJSKIH SREDSTAVA**

### **Član 5. (Javni poziv)**

- (1) Općinski načelnik raspisuje javni poziv za finansiranje/sufinansiranje sportista sa područja Općine Stari Grad Sarajevo, shodno odredbama ovog Pravilnika.
- (2) Javni poziv iz stava (1) ostaje otvoren do kraja godine od dana objavljivanja na web stranici Općine Stari Grad Sarajevo.

**Član 6.**  
**(Sadržaj Javnog poziva)**

(1) Javni poziv obavezno sadrži:

- naziv organa koji raspisuje poziv;
- osnov ostvarivanja finansijskih sredstava;
- spisak dokumentacije koja se obavezno dostavlja uz prijavu;
- aplikaciju za prijavu na javni poziv;
- rok za prijavu na javni poziv.

**Član 7.**  
**(Dokumentacija za Javni poziv)**

Uz popunjeni Prijavni obrazac Javnog poziva, podnosilac zahtjeva obavezan je dostaviti sljedeću dokumentaciju (potpisane akte, originale ili ovjerene kopije) kako slijedi:

1. Uvjerenje o državljanstvu ili Izvod iz matične knjige rođenih sa upisanim državljanstvom (ne stariji od 6 mjeseci);
2. Potvrdu/obavještenje o prebivalištu iz CIPS-a (ne starija od 6 mjeseci);
3. Uvjerenje o kretanju (ne starije od 3 mjeseca do dana podnošenja prijave);
4. Potvrdu o statusu sportiste izdatu od strane nadležnih institucija resornog ministarstva, strukovnog saveza;
5. Potvrdu strukovnog saveza o ostvarenom sportskom uspjehu u protekloj sezoni kao dokaz o ispunjavanju jednog od kriterija iz člana 3. i 4. ovog Pravilnika;
6. Izjavu kandidata kojom se daje saglasnost da se njegovi podaci mogu obrađivati u skladu sa članom 5. Zakona o zaštiti ličnih podataka („Službeni glasnik BiH“ broj 76/11). Za maloljetne kandidate izjavu daje roditelj/staratelj i ista treba biti ovjerena od strane nadležne općinske službe;
7. Potvrdu o otvorenom bankovnom računu.

**V – ODLUKA O DODJELI FINANSIJSKIH SREDSTAVA**

**Član 8.**  
**(Odluka o finansijskim sredstvima)**

(1) Općinski načelnik nakon usvajanja Budžeta za tekuću godinu, a prije raspisivanja Javnog poziva za finansiranje/sufinansiranje sportista sa područja Općine Stari Grad Sarajevo donosi Odluku o iznosu planiranih sredstava kojom se utvrđuje iznos finansijskih sredstava planiranih za ove namjene.

- (2) Sredstva za finansiranje/sufinansiranje sportista za odlazak na državna i međunarodna takmičenja se dodjeljuju za tekuću godinu i ista se isplaćuju u skladu sa budžetom.
- (3) Općinski načelnik ima pravo da tokom godine mijenja akt iz stava 1. ovog člana.

## **VI - OPĆI I POSEBNI KRITERIJI ZA FINANSIRANJE/SUFINANSIRANJE TROŠKOVA TAKMIČENJA**

### **Član 9.**

#### **(Opći kriteriji za dodjelu sredstava)**

Opći kriteriji za dodjelu sredstava sportistima su sljedeći:

- da je državljanin BiH;
- da ima prebivalište na Općini Stari Grad Sarajevo najmanje jednu godinu, do dana objave javnog poziva;
- da je član kluba koji je registrovan za takmičenje u zvaničnom strukovnom sportskom savezu Federacije Bosne i Hercegovine/Bosne i Hercegovine.

### **Član 10.**

#### **(Posebni kriteriji za dodjelu finansijskih sredstava)**

(1) Posebni kriterij za dodjelu finansijskih sredstava iz Budžeta Općine Stari Grad Sarajevo u skladu sa odredbama ovog Pravilnika za sve sportiste sa području Općine Stari Grad Sarajevo u pojedinačnoj i ekipnoj konkurenciji su sljedeći:

- učešće na Olimpijskim i paraolimpijskim igrama;
- učešće na Univerzijadama;
- učešće na Svjetskim prvenstvima i kupovima, evropskim prvenstvima i kupovima;
- Mediteranskim igrama priznato od svjetskih i evropskih federacija;
- učešće na državnim prvenstvima.

**Član 11.**  
**(Takmičari)**

- (1) Pravo na dodjelu finansijskih sredstava u skladu sa ovim Pravilnikom mogu ostvariti sportisti za pripremu i odlazak na sportska takmičenja (Olimpijada, Evropsko i Svjetsko prvenstvo, Mediteranske igre, Balkansko prvenstvo, Državno prvenstvo, Univerzijada).
- (2) Ukoliko aplikant u toku jedne godine ima više takmičenja, finansiranje/sufinansiranje može ostvariti samo za jedno takmičenje.

**Član 12.**  
**(Komisija)**

- (1) Općinski načelnik nakon usvajanja budžeta za tekuću godinu, a prije raspisivanja javnog poziva iz člana 5. ovog Pravilnika imenuje Komisiju za postupanje po aplikacijama pristiglim na Javni poziv za finansiranje/sufinansiranje sportista Općine Stari Grad Sarajevo za odlazak na državna i međunarodna takmičenja.
- (2) Komisija se imenuje na period od raspisivanja Javnog poziva do okončanja procedure te broji: 5 (pet) članova, od kojih je jedan predsjednik Komisije. Komisiju čine 3 (tri) člana koji su državni službenici i 2 (dva) člana koji su predstavnici Općinskog vijeća Stari Grad Sarajevo.
- (3) Komisija ima zadatak da:
  - Pregleda sve aplikacije sa dostavljenom dokumentacijom;
  - Aplikacije uz koje nije dostavljena obavezna dokumentacija iz člana 10. ovog Pravilnika, odbacuje kao da nisu ni podnesene i o istom obavještava aplikanta pismenim putem;
  - Aplikacije koje ispunjavaju kriterije utvrđene ovim Pravilnikom, Komisija dostavlja Općinskom načelniku na odobravanje, uz preporuku o iznosu sredstava za svakog aplikanta pojedinačno uzimajući u obzir troškove koje aplikant ima tokom trenažnog procesa i priprema za takmičenja.
- (4) Zadatak Komisije je da u skladu sa odredbama ovog Pravilnika i na osnovu propisanih kriterija objavljenih u Javnom pozivu, svakih 60 dana pregleda dostavljene prijave sa dokumentacijom, te sačini pismeni izvještaj sa utvrđenim prijedlogom liste korisnika sredstava namijenjenih za podršku vrhunskim/perspektivnim sportistima na području Općine Stari Grad Sarajevo.

**Član 13.**  
**(Dodjela finansijskih sredstava)**

Općinski načelnik na osnovu preporuke Komisije iz člana 13. donosi Odluku o dodjeli sredstava za svakog aplikanta pojedinačno, shodno odredbama ovog Pravilnika.

**Član 14.**  
**(Ugovor)**

Na osnovu Odluke Općinskog načelnika, sa izabranim aplikantom zaključuje se ugovor o dodjeli sredstava kojim se regulišu međusobna prava i obaveze.

**Član 15.**  
**(Pravdanje sredstava)**

- (1) Dodijeljena sredstva po osnovu ugovora iz člana 13. aplikant je obavezan opravdati najkasnije 30 dana od dana završetka takmičenja, a najkasnije do 31.12. tekuće godine.
- (2) Ukoliko se ne opravdaju sredstva na način utvrđen stavom (1) ovog člana, podnosilac zahtjeva je obavezan finansijska sredstva vratiti u roku 30 (trideset) dana, u protivnom će se pokrenuti postupak pred nadležnim sudom putem Pravobranilaštva Općine Stari Grad Sarajevo, a isti neće imati pravo na dodjelu sredstava iz Budžeta Općine narednih 5 (pet) godina.

**Član 16.**  
**(Osobe s invaliditetom)**

Odredbe ovog Pravilnika se jednako primjenjuju i na sportiste s invaliditetom.

**VII – PRELAZNE I ZAVRŠNE ODREDBE**

**Član 17.**  
**(Stupanje na snagu Pravilnika)**

Ovaj Pravilnik stupa na snagu danom donošenja i isti će biti objavljen u „Službenim novinama Kantona Sarajevo“.

**PREDSJEDAVAJUĆI**  
**OPĆINSKOG VIJEĆA STARI GRAD**  
**SARAJEVO**

**Seid Škaljić**

Broj: 02-45-\_\_\_\_\_/24  
Sarajevo, 10.2024. godine

## **OBRAZLOŽENJE**

### **I PRAVNI OSNOV**

Pravni osnov za donošenje Pravilnika o dodjeli sredstava sportistima sa područja Općine Stari Grad Sarajevo sadržan je u preambuli akta.

### **II RAZLOZI DONOŠENJA**

S ciljem afirmacije sporta i pružanju podrške jedinice lokalne samouprave u oblasti sporta što je ujedno i obaveza iste propisana Statutom Općine Stari Grad Sarajevo inicira na utvrđivanje jasnih kriterija za ostvarivanje prava na dodjelu sredstava sportistima sa područja starogradske Općine.

Dosadašnja praksa pokazala je da se za ovu vrstu podrške obraća veliki broj stanovnika Općine Stari Grad Sarajevo, pa se nametnula potreba utvrđivanja jasnih kriterija za ovu vrstu finansiranja.

Pravilnikom je predviđeno 7 (sedam) poglavlja, kako slijedi:

I-Opće odredbe;

II-Vrhunski sportisti

III-Perspektivni sportisti

IV-Javni poziv

V-Odluka o dodjeli finansijskih sredstava;

VI- Opći I posebni kriteriji

VII-Prelazne i završne odredbe.

### **III FINANSIJSKA SREDSTVA**

Finansijska sredstva za ove namjene planirana su u Budžetu Općine Stari Grad Sarajevo.

**Predlagač:**  
**Općinski načelnik**  
putem Službe za obrazovanje, kulturu, sport i mlade